

**TRIBUNA POLITICA**

# Energia netta senza charvun

DA SILVA SEMADENI,  
CUSSEGLIERA NAZIUNALA

L'iniziativa dal pievel «Gea ad electricitad netta senza ovras da charvun» vegn ils 22 da settember 2013 in votaziun. Il motiv: L'interpresa d'energia Repower, che tutga cun 58,3% al chantun Grischun, insista da vulair realisar a Saline Joniche in'ovra da charvun. Quai che in Svizra - maindir in Grischun - na savess nagliur vegnir realisà, quai duai vegnir fabritgà cun sustegn grischun cunter la voluntad da la populaziun locala in Calabria (Italia dal sid). L'iniziativa dal pievel, lantschada da grischunas e grischuns preoccupads, vul impedir quest project.

## Charvun nuschaivel

In'implant a charvun sco quel planisà da Repower a Saline Joniche produce-scha mintg'onn ses giadas tant CO2 sco tut las chasadas grischunas ensemen. Problematica è era la pulvra da metals toxica che sa derasa en l'aria cun arder il charvun. Perquai i na fa betg surstar ch'il parlament regional e las vischnancas in Calabria sa dostan fin avant dertgira encunter quest project. Ovras da charvun donnegeschan plinavant globalmain il clima ed uschia patescha era la regiun alpina. La retratga dals glatschers u l'augment da las bovas vegnan a esser



en ils proxims decennis ina gronda sfida per las Alps. Igl è nunchapibel ch'in'interpresa statala grischuna s'engascha per in tal project che fa donn al clima.

## Betg encunter Repower

L'iniziativa dal pievel vul che Repower renunzia a quest'implant a charvun da passa ina milliarda euros. Interpresas cun partecipaziun dal chantun na duain betg investir en ovras da charvun. Nagin metta però en dumonda la gronda muntada da Repower per il chantun e las plazzas da lavur en las regiuns. Las aziuns da tementar dals adversaris da l'iniziativa èn perquai deplazzadas. Il chantun na vegn betg sfurzà da vender sia partecipaziun da 58,3% tar Repower. Quai ha confermà l'Axpo, il segund aziunari grond da Repower. E Repower ha gia experientscha cun ina retratga dad in project per in'ovra da

charvun a Brunsbüttel (Germania). Autras interpresas d'electricitad da la Svizra han era renunzià a plans per implants a charvun a l'exteriur pervi da la rentabilitad. Cun desister da talas ovras savess Repower rinforzar ses image d'in'interpresa netta da la regiun alpina.

## Aua, laina, sulegl - ed efficienza

Repower sa preschenta Ren il avegnir pli cunvegnentamain sch'ella sa posizionescha en il sector da las energias regenerablas e da l'effizienz energetica. Aua, laina e sulegl - e in pau vent - èn las funtaunas d'energia indigenas dal Grischun. Sin nossas autez-zas, per ordinari senza tschajera, è il grond potenzial dal sulegl anc per gronda part nunutilisà. Tar l'effizienz energetica stat la sanaziun dad edificis en il center. L'economia po optimar il consum d'energia e spargnar uschia era daners. Investiziuns en quests secturs portan lavur e gudogn per il mastergn en l'entir chantun. Quai è dal rest l'intenziun da la strategia 2050 dal Cussegl federal per bandunar pass a pass l'energia atomara. Il provediment electric segir ed efficient cun 100% forza indigena e regenerabla è la finamira a lunga vista. Ovras da charvun na sa cunfan betg cun quest scenari.